

**Publication:** Kosmo  
**Section:** Niaga  
**Date:** 28 October 2009  
**Page:** 54

## Bursa Malaysia cadang wujudkan ESG

**KUALA LUMPUR** – Bursa Malaysia bercadang mewujudkan Indeks Alam Sekitar, Sosial dan Tadbir Urus (ESG) dalam tempoh beberapa tahun akan datang sebagai usaha menarik para pelabur meningkatkan kesedaran dalam bidang tersebut, kata Ketua Pegawai Eksekutifnya, Datuk Yusli Mohamed Yusoff.

Katanya, bursa tempatan akan menjalin usahasama dengan satu penyedia indeks untuk membantu mewujudkan indeks ini dan kemudiannya memberi penarafan kepada kesemua syarikat tersenarai dan memilih yang terbaik bagi Indeks ESG.

"Jika para pelabur prihatin dengan isu ini, Indeks ESG sepatutnya memberi satu petunjuk. Di dalam tempoh jangka panjang, bagi membolehkan perniagaan berjaya dan dikekalkan, mereka perlu melihat kepada ESG secara serius," katanya kepada pemberita selepas berucap pada Sidang Kemuncak CSR Asia 2009 di sini semalam.

Jelasnya, syarikat yang berhadapan dengan isu berkaitan dengan alam sekitar dan perubahan iklim seperti yang terlibat dengan perniagaan minyak sawit perlu menanganinya dengan teratur kerana ia akhirnya akan memberi kesan bagaimana produk mereka dilihat di pasaran global. - Bernama